

मार्निंग डोगरी न्यूज़ बुलेटिन,

समा. 09.20 Hrs

<><><><><><><><><><><><>

Headlines

- उपराष्ट्रपति दे ओहदे लेई मतदान अज्ज बड्डलै 10 बजे संसद भवन च शुरु होग, वोटें दी गिनतरी शामी 6 बजे।
- उपराज्यपाल मनोज सिन्हा होरें विकसित भारत दे निर्माण लेई शिक्षा च नवाचार ते नमीं टैक्नोलोजी दी बरतून पर जोर पाया, जम्मू युनिवर्सिटी दे स्थापना दिवस दे मौके मुख भाषण दिता।
- मुखमंत्री उमर अब्दुल्ला होरें औंदी कश्मीर मैराथन दियें तयारियें दी समीक्षा कीती, एहदी मशहूरी आहला वीडियो बी जारी कीता।
- कुलगाम टाकरे दौरान दंडू आतंकवादियें दा सफाया, दंडू सैनिक बी शहीद।
- जम्मू-कश्मीर च औंदे किश दिनें दौरान झड़ ते कुतै-कुतै हलके कोला दर्मयाने दर्जे दी बरखा दे आसार, जम्मू-श्रीनगर राष्ट्रीय जरनैली सिड़क अज्ज उप्परोतली 8में रोज बी बंद।

<><><><><><><><>

V.P. Election

अज्ज होने आहले उपराष्ट्रपति दे ओहदे लेई चुनां गितै सब्भै तयारियां करी लैतियां गेदियां न। इस चुनां च NDA दे मेदवार महाराष्ट्र दे राज्यपाल CP राधा कृष्णन हुंदा मुकाबला INDI ब्लाक दे मेदवार ते सुप्रीम कोर्ट दे साबका जज बी. सुदर्शन रेड्डी हुंदे कन्नै ऐ। इस्सै बरे जुलाई च

जगदीप धनखड़ हुंदे आसेया सेहत कारणें करी इस्तीफा दिते जाने दे बाद एह चुनां कराना पवा करदा ऐ।

<><><><><><>

LG-JU-

उपराज्यपाल मनोज सिन्हा होरें विकसित भारत दे निर्माण लेई विद्यार्थियें ते नौजवानें गी भविक्ख दियें चुनौतियें लेई पैहले सवा तयार करी रखने दी जरूरतें पर जोर दिता ऐ। कल जम्मू युनिवर्सिटी दे स्थापना दिवस दे सिलसिले च आयोजित इक कार्यक्रम च मुख भाषण दिंदे होई उपराज्यपाल होरें आक्खेया जे शिक्षा दे क्षेत्र च संगठित स्थिरता ते संरक्षण लेई, युनिवर्सिटी गी नमियें काहड़ें ते भलेयां अज्जै-कल्लै दियें तकनीकें दी बरतून शिक्षा च बी लाजमी तौरा पर करनी लोड़चदी। राष्ट्र निर्माण च नौजवानें दी भूमिका गी उजागर करदे होई एल.जी होरें आक्खेया विकास दा मकसद ते मतलब कुदरती म्हौल ते बवस्थाएं गी नुक्सान पुजाए बिजन समाज दियें जरूरतें गी पूरा करना होना लोड़चदा। उनें उपलब्ध संसाधनें दा पूरा-पूरा इस्तेमाल करदे होई बहुमुखी रौं अपनाने पर जोर दिता तां जे औने आहलियें पीढ़ियें लेई बेहतर भविक्ख यकीनी बनाया जाई सकै।

<><><><><><>

CM Kashmir Marathon

मुख्यमंत्री उमर अब्दुल्ला होरें जंदे रोज कश्मीर मैराथन दियें तयारियें दा जायजा लैने लेई इक उच्ची सतह दी समीक्षा बैठक दी अध्यक्षता कीती ते 2 नवम्बर 2025 गी होने आहले इस प्रमुख खेड्द आयोजन आस्ते प्रचार वीडियो जारी कीता। उनें आक्खेया जे इस आयोजन च

कश्मीर दी संस्कृति-खान-पान-कला ते विरासत गी उजागर करदे होई खेड्डें गी संस्कृति ते सैलसफा कन्नै जोड़ेया जाना लोड़चदा ऐ। इस बरे दी मैराथन च श्रीनगर दी प्रतिष्ठित थ्हारें पर फुल-हाफ ते 10 किलोमीटर दी द्रौड़ शामिल होग। इस कार्यक्रम च मैराथन एक्सपो ते इक शानदरा सांस्कृतिक संध्या बी होग जेहदे च खडारियें-सैलानियें ते मुकामी लोकें गी बी शामिल कीता जाग। मुख्यमंत्री होरें विशेष पैकेज लेई होटलें ते कारोबारियें कन्नै सैहयोग करने दे निर्देश दिते ते इस आयोजन गी इक प्रमुख खेड्ड ते सांस्कृत प्रदर्शन बनाने दे मकसद कन्नै पर्यावरण दे रक्ख-रखा दे महत्व पर जोर पाया।

<><><><><><>

GST Cosmetics

मुख्य दे बाकी हिस्सें आहला लेखा जम्मू-कश्मीर च बी सरकार आसेया माल-समेयान ते सेवाएं सरबन्धी GST दियें दरें च कटोती करने दे फैसले दा सुआगत कीता ऐ। इस महीने दी 22 तरीक थमां लागू होआ रदियें नमियें दरें साबबै कास्मेटिक्स यानि सजने-सवरने ते सौन्दर्य कन्नै जुड़े दा समेयान बी सस्ता होग-जेहदे बारे अज्ज केई उपभोक्ताएं दे विचार जानने आं। जियां जे पैहले बी खबर दिती जाई चुकी दी ऐ कि शैंपू-बालें लाने आहले तेल-शेविंग क्रीम-पोडर-लोशन वगैरा पर GST दा रेट 18 प्रतिशत कोला घटाइयै 5 प्रतिशत करी दिता गेदा ऐ। मकामी लोकें दा आक्खना ऐ जे एहदे नै लौहके दकानदारें ते कारोबारियें पर माली दबाव घट्ट होग ते ग्राहकें गी बी चीजां सस्ते भाएं पर थहोगंन। आकाशवाणी समाचार जम्मू कन्नै गल्ल करदे होई उपभोक्ताएं GST घटाने दियें फैसले दा सुआगत कीता.

<><><><><><>

Pro. Announcement

सेवा सप्ताह 2025 दे तैहत आयोजित बक्ख-बक्ख कार्यक्रमें ते गतिविधियें दे इक हिस्से दे तौरा पर आकाशवाणी दा क्षेत्रीय समाचार एकांश जम्मू, औंदी 10 सितम्बर गी इक वशेष परिचर्चा प्रसारत करने जा रदा ऐ-जेहदा विषय सार ऐ- “निग्गर आर्थिक सुधारें राएं विकास गी बढ़ावा।” इस कार्यक्रम च स्हाड़े महमान होगन- मन्ने-परमन्ने दे अर्थशास्त्री ते जम्मू युनिवर्सिटी च इकोनॉमिक्स दे प्रोफैसर दिपांकर सेनगुप्त- जेहड़े इस विषय दे बक्ख-बक्ख पैहलुएं पर लौ पांगन। उन्दे कन्नै गल्लबात करगन-साढ़े एंकर जगमोहन शर्मा ते कुणाल श्रीवत्स। 30एं मिन्टे दा एह कार्यक्रम कल बुधवारे दिने साइडे 12 बजे प्रसारत कीता जाहग। जिसी तुस स्हाड़ी FM फ्रिक्वेंसी 100 इशारिया 3 मैगाहर्ट्स ते कन्नै मीडियम वेव 303 मीटर यानि 990 Khz पर बी सुनी सकदे ओ।

<><><><><><>

Kulgam Encounter

दक्खनी कश्मीर दे कुलगाम जिले च जारी टाकारे च भारतीय फौज दे 2 जवान सूबेदार प्रभात गौर ते लांस नायक नरेन्द्र सिंधु शहीद होई गे न- जिसलै के सुरक्षाबलें अजें तगर दंडू बे-पंछानू आतंकवादियें गी मारी मकाया ऐ। चिनार कोर मुजब- खास खूफिया जानकारी हासल होने मगरा सेना- CRPF ते जम्मू-कश्मीर पुलिस आसेया जंदे रोज गुद्दार जांगली इलाके च इक सांझी कारवाई शुरु कीती गई। तलाशी दौरान सुरक्षाबलें संदिग्ध आतंकवादियें गी चुनौती दिती पर आतंकियें गोलीबारी शुरु करी दिती जेहदे फलसरूप जबरदस्त गोलीबारी होई। इस कारवाई च दंडू आतंकवादियें गी मारी दिता गया। एह अभियान अजें बी जारी ऐ।

IMCT Team

जम्मू-कश्मीर च हाल दिये बरखे ते हाड़े करी होए दे नुकसान ते ताजा हालात दा जायजा लैने लेई केन्द्र आसेया भेजी गेदी अंतर मंत्रालयी टीम नै कल कुलगाम-अनंतनाग ते शोपिया जिले दा दौरा लाया ते उत्थे जमीनी हालात ते स्थिति दी समीक्षा कीती। राष्ट्रीय आपदा प्रबंधन प्राधिकरण दे सलाहकार ते जायंट सैक्रेटरी कर्नल के.पी. सिंह हुंदी अगुआई आहली टीम जिला प्रशासन कन्ने जायजा बैठका लाने दे इलावा प्रभावत इलाके दा दौरा करिये जमीनी हालात दा जायजा लैता। टीम गी सरबन्धित अधिकारिये हाड़े ते बरखे कारण होए दे नुकसान बारे जानकारी दिंदे होई राहत ते बचाव कारवाइये दे इलावा जारी बाआबादकारी दे कम्म बारे बी दस्सेया-दसाया। टीम नै प्रभावत लोके दे पुनर्वास लेई सरबन्धित बक्ख-बक्ख मैहकमे बश्कार नेइमा तालमेल बनाइये कम्म करने पर जोर दिता।

HC Aid

जम्मू-कश्मीर ते लद्दाख दी हाई-कोर्ट नै हाड़े दी चपेट च आए दे परोआरे प्रति इक-जुटता दी भावना कन्ने महत्वपूर्ण सहायता उपलब्ध करोआई ऐ। हाई-कोर्ट दे रजिस्ट्रार जनरल होरे राहत कोष लेई 54 लक्ख 40 जहार रपे दा चैक मुखमन्त्री उमर अब्दुल्ला होरे गी सौंपेया। एह योगदान हाई-कोर्ट दे मन्ने-परमन्ने दे जजे ते अमले आसेया दिता गया ऐ। मुखमन्त्री होरे आभार प्रगट करदे होई आक्खेया जे इस उदारता कन्ने कीते गेदे इस कम्म कन्ने हाल च आए

दे हाईं करी प्रभावित परोआरें गी राहत ते पुर्नवास उपलब्ध करोआने लेई सांझे जतनें च मता बाददा होग।

<><><><><><>

Weather /Traffic

मौसम विभाग नै जम्मू-कश्मीर च औंदे किश दिनें दरान मती सारी थाहरें पर हौली बरखा बरने ते गासै च बदल घनोए दे रौहने दी पेशगोई कीती ऐ। मैहकमे दा आकखना ऐ जे जम्मू संभाग दे किश जिलें च हौली थमां दरम्याने दर्जे दी बरखा बरी सकदी ऐ। उआं 12 सितंबर तोड़ी प्रदेश च आमतौरा पर मौसम खुशक रौहग पर किश थाहरें पर हौली बरखा बरी सकदी ऐं 13 सितंबर गी जम्मू-कश्मीर दे मते सारे हिस्सें च बड्डलै सवैलै गरज-चमक कन्नै हौली थमां दरम्याने दर्जे दी बरखा बरने दी संभावना दस्सी गेई ऐ।

तौंआई जम्मू-श्रीनगर राष्ट्री जरनैली सिड़क अज्ज उप्परोतली 8में ध्याड़े बी गड्डियें दी आओ-जाई लेई बंद ऐ।

<><><><><><>